
IS-BWYLLGOR TRWYDDEDU CANOLOG 20.02.14

Yn bresennol: Cyng. Eryl Jones-Williams, Cyng. Louise Hughes, Cyng Ann Williams

Hefyd yn bresennol: Mr Ian Williams (Cydylynydd Trwyddedu Heddlu Gogledd Cymru), Geraint Edwards (Cyfreithiwr), Gwenan M Williams (Rheolwr Trwyddedu), Heilyn Williams (Swyddog Trwyddedu) a Lowri H Evans (Swyddog Cefnogi Aelodau a Chraffu),

1. CROESO

Croesawyd pawb i'r cyfarfod gan y Cadeirydd, y Cynghorydd Eryl Jones-Williams. Cyflwynwyd y panel ar swyddogion i bawb oedd yn bresennol.

2. DATGAN BUDDIANT PERSONOL

Dim i'w nodi

3. MATERION BRYD

Dim i'w nodi

4. CAIS AM AMRYWIAD TRWYDDED EIDDO – Y CWRT, BALA

Ar ran yr eiddo: Mr Maesoud Anafcheh, Ms Moira Mai

Eraill: Mr Martin Tranter (S A Brains), Mr M Phipps (S A Brains), Mr Paul Grainge (Preswylydd Lleol), Ms Valerie Floyd (Preswylydd Lleol)

Ymddiheuriadau: Dim i'w nodi

Amlygodd y Cadeirydd bod pryder wedi codi ynglŷn â hawliau'r panel i ystyried y cais dan sylw gan nad oedd y broses hysbysebu yn cydymffurfio a gofynion Deddf Trwyddedu 2003.

Ar gyngor cyfreithiol, penderfynodd yr Is-bwyllgor nad oedd modd gwneud penderfyniad mewn perthynas â'r cais:

1. Mae grym yr Is-bwyllgor i ystyried cais gwyro yn deillio o adran 35 o'r Ddeddf Trwyddedu 2003 ("y Ddeddf"). Tydi'r adran honno ddim ond yn gymwys os yw'r awdurdod yn derbyn cais i wyro trwydded o dan adran 34 ac yn fodlon bod yr ymgeisydd wedi cydymffurfio â gofynion a bennir yn sgil adran 34(5) o'r Ddeddf.
2. Mae adran 34(5) yn pennu bod y ddyletswydd i lunio rheoliadau o dan adran 17(5) o'r Ddeddf hefyd yn gymwys i geisiadau o dan adran 34.
3. Mae adran 17(5) yn pennu bod gofyn i'r Ysgrifennydd Gwladol lunio rheoliadau sydd yn gofyn i'r ymgeisydd hysbysebu cais mewn ffordd benodol.
4. O dan reoliad 25 o'r Rheoliadau Deddf Trwyddedu 2003 (Trwyddedau Mangre a Thystysgrifau Mangre Clwb) 2005, mae gofyn i ymgeisydd ymhlith pethau eraill gyhoeddi hysbyseb o'r cais (i) mewn papur newydd newydd neu ddogfen gyffelyb, sydd yn cylchredeg yn ardal y fangre, a (ii) ar o leiaf un achlysur o fewn cyfnod o 10 diwrnod gwaith gan gychwyn gyda'r diwrnod ar ôl y diwrnod y rhoddwyd y cais i'r awdurdod trwyddedu perthnasol.
5. Y dyddiad y cyflwynwyd y ffurflen gais i'r Cyngor yw 8 Gorffennaf 2013. Byddai felly wedi bod gofyn i'r ymgeisydd gyhoeddi hysbyseb ar unrhyw ddyddiad rhwng 9 Gorffennaf 2013 ac 18 Gorffennaf 2013.

6. **Mewn perthynas â'r cais hwn cafwyd ar ddeall na chyhoeddwyd unrhyw hysbyseb yn ystod y cyfnod uchod. Nid oedd tystiolaeth bod y cais wedi ei hysbysebu yn ystod y cyfnod statudol.**
7. **Yn yr amgylchiadau, nid oedd yr Is-bwyllgor yn fodlon bod y cais yn cydymffurfio â gofynion adran 34(5) o'r Ddeddf. O ganlyniad nid oedd gan yr Is-bwyllgor awdurdodaeth i benderfynu ar y cais o dan adran 35. Os yw'r ymgeisydd yn dymuno gwyro ei drwydded, bydd gofyn cyflwyno cais gwyro o'r newydd.**

Mynegwyd siom nad oedd modd parhau gyda'r gwrandawriad gan bod gohebiaeth wythnosol wedi ei gynnal gyda'r partion perthnasol a'r Uned Drwyddedu. Awgrymwyd y dylai'r wybodaeth ynghlyn a'r diffygion yn y broses hysbysebu fod wedi eu datrys cyn galw am wrandawriad.

Mynegwyd yn ogystal fod yn arferiad gan Awdurdodau Trwyddedu i ymestyn cyfnod ymgynghori ar gais mewn amgylchiadau lle nad ydyw'r ymgeisydd wedi llwyddo i hysbysebu'r cais yn unol â gofynion y rheoliadau.

Cytunwyd er hynny, bod rhaid cadw at drefn. Canlyniad y gwrandawriad yn debygol o fod yn agored i her ac felly angen sicrhau bod gofynion y ddeddf yn cael eu cyfarch.

Adroddodd y Cyfreithiwr y byddai'n anelu at anfon llythyr yn cadarnhau yn ffurfiol i bawb oedd yn bresennol, benderfyniad yr Is-bwyllgor.

Hysbyswyd yr ymgeisydd y bydd angen iddo wneud cais o'r newydd.

Dechreuodd y cyfarfod am 11:00pm a daeth i ben am 11:55pm